

Noticia
Transparente
di Gobierno

ISLA ONLINE

Diamars 18 Juni 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



PROME MINISTER A REUNI CU DOS STUDIANTE EN CONEXION CU PUBLICACION DI UN BUKI RIBA E TEMA DI GENERO Y EDUCACION


Dialuna merdia, Prome Minsiter Evelyn Wever-Croes a reuni cu dos estudiante di Universidad di Aruba, pa asina wordo entrevista, como Prome Minister di pais Aruba den cuadro di un buki cu lo wordo publica riba "Gender and Education".

Prome Minister a expresa, cu e reunion aki tabata uno hopi interesante y importante, mirando cu ta sumamente necesario pa e rol di hende muhe semper ta den bista di tur loke ta wordo haci. Y e enfasis di e buki aki ta basa riba e rol di hende muhe y educacion.

Tambe, Prome Minister a indica, cu el a logra tur loke e por a logra como hende muhe, danki na e oportunidadnan cu el a haya di su mama, y mescos su mama a haya di su wela. Tur mama ta hunga un papel hopi importante den bida di nan yiunan, y semper mester brinda e mesun oportunidad na cada un di nan, irrespecto si ta yiu muhe of yiu homber. P'esey e investigacion aki ta importante, pasobra e lo demostra e importancia di e rol di e mama pa loke ta trata trato igual den cas entre su yiunan, specialmente ora ta yega na educacion di cada yiu.

Estudionan haci ta muestra cu mayoria di trabou cu awe ta existi no ta bay existi den futuro, y cu mayoria di e trabounan den futuro ta desconoci. P'esey ta di suma importancia pa tur mucha wordo bon prepara cu e hermentnan necesario, pa den futuro por subi e mercado laboral exitosamente. Cu esaki ta referi na educa e muchanan den e ramo di Ciencia, Tecnologia, Ingenieria y Matematica (Science, Technology, Engineer and Mathematics, STEM), mirando cu e materianan aki lo por yuda nan pa den futuro nan por haya un trabou mas facil.

Ta conoci cu hopi ta e mucha muhenan cu no tin interes den e ramo di STEM, p'esey mester pone enfasis pa cada un di nan cera conoci cu e materianan aki, cu e speransa di por crea mas interes entre nan. Ministerio di Asuntonan General a bin ta haci hopi proyecto riba e tema aki, y awor e investigacion aki lo duna un miho bista di con pais Aruba ta atende cu e posicion y oportunidad igual. Prome Minister ta desea e studentenan aki hopi exito cu nan investigacion. ■■■





MINISTER

Ursell Arends

ELABORACION AMPLIO Ariba MANEHO DI SECTOR PRIMARIO DURANTE CONFERENCIA DI PRENSA



Awe mainta Minister Ursell Arends y Minister Geoffrey Wever a presenta diferente informacion tocante sector primario den conferencia di prensa. E presentacion su enfoca tabata ariba e maneho di practicanan y comercio pa agricultura.

Minister Arends a enfoca ariba e metanan di e maneho nobo di sector primario. E meta principal di e maneho ta pa mehora seguridad di alimentacion y e colaboracion di stakeholders pa asina transforma agricultura den un sector sostenibel y inclusivo.

E situacion actual ta cu 3% di nos alimentacion ta produci na Aruba. E meta ta pa subi esaki pa 25% pa aña 2030. Tin algun reto cu ta wordo enfrente pa por actualisa e metanan proponi. Falta di ley y regulacion, contribucion insuficiente na seguridad di alimentacion, falta di coleccion di data, instabilidad y falta di resiliencia ta algun di ehempel di esakinan. Tambe tin oportunidadnan identifica, cual ta formalisacion di organisacion

y representacion, conocimiento, capacidad, educacion y cooperacion di sector primario. Un aspecto importante ta e implementacion di GAP (Good Agricultural Practices). GAP lo asegura calidad den produccion agricola, ariba uzo di pesticida, proteccion ambiental y trato di cria. E implementacion di GAP lo wordo haci den fase pa asina por mira su desaroyo den nos comunidad agricultor.

Incentivanan pa Comercialisacion di Agricultura

Minister Wever a elabora ariba e programa di finansamento pa empresarionan agricola yama 'Agri Fund'. Un colaboracion entre Ministerio di Asunto Economico y Desaroyo Sostenibel, Ministerio di Naturalesa y Qredits lansa pa yuda stimula comercio den e sector primario. Diferente negoshi a wordo otorga e prestamo cu tin un interes abou, pa asina yudanan crece.

Conferencianan di Agricultura Internacional

Na fin di mei, Minister Arends a atende conferencia 'Dutch Caribbean Agriculture Livestock and Fisheries Alliance (DCALFA)' cual a tuma luga na Sint Eustatius. Un conferencia cu a brinda oportunidad valioso pa e iniciativanan cu ta tumando luga den sector primario na islanan den Reino Hulandes. Ademas, a bishita Saba y a ricibi recorrido na varios sitio agricola, criadonan, instancia di hydroponics, Fundacion Saba Reach y un edificio cu ta facilita e piscadonan di Saba pa warda nan materialnan.

Proyectonan di Agroforesteria

Diasabra ultimo e proyecto di agroforesteria na scolnan a wordo finalisa. E programa comunitario a instala 11 hardin di alimentacion total na scolnan. E meta ta pa siña muchanan con pa planta y cosecha diferente fruta y berdura pa asina educa nan y crea habitonan sostenibel.

Minister Arends ta enfatisa e importancia pa crea un sector primario sostenibel y cu huntu nos ta cosecha e futuro. ■■■



MINISTER DI CULTURA XIOMARA MADURO A PRESENCIA E PROYECTO ESCOLAR "FIESTA DI SAN JUAN" NA CAS TAN TIN



Dialuna mainta Minister Maduro tabata na Cas Tan Tin pa por a presencia e proyecto escolar di Departamento di Cultura "Fiesta di San Juan - Dera Gay," na unda nos muchanan ta ricibi informacion tocante nos fiesta tradicional di cosecha riba Dia di San Juan, dia 24 di juni proximo.

Departamento di Cultura den colaboracion cu Cas Tan Tin y Brandweer Aruba a organisa un programa educativo pa muchanan di Scol Preparatorio y Basico di 1ste te cu 3de klas. Un total di 32 scol y como 3 mil mucha ta haya oportunidad pa experiencia y wordo educa riba e Dia di San Juan y e baile di Dera Gay den e periodo di 11 pa 20 di juni.

Den e sabana di Cas Tan Tin, Minister Maduro di Cultura por a presencia e splicacion di parti di e elenco di Departamento di Cultura lidera pa John Freddy Montoya, cu a duna splicacion di e motibo di e celebracion di Dia di San Juan y a muestra tur elemento di e fiesta cu ta importante pa e muchanan por reconoce den e celebracion. A sigui canto di canticanan popular di tempo di cosecha, demostracion di e baile di San Juan y tambe tabata tin un competencia di e grito di Gay, cu ta eventonan cu ta forma parti di e celebracion di Dia di San Juan.

Di parti di Brandweer Aruba, Sr. Francis Toussaint a splica e hobennan riba e tradicion di cende candela riba Dia di San Juan y a conseha pa evita di cende candela, ya cu esaki por ta peligroso pa hende, bestia y nos medio ambiente. A duna tips con mester trata si acaso un candela wordo cendi pa evita peligro.

Na final di e evento, Minister Maduro a parti un certificado na cada mucha cu a participa den e demostracion di baile y e wega di grito di gay. Despues tur scol a haya un recorido den e cas monumental Cas Tan Tin pa asina nan por mira con tabata biba antes na Aruba.

Minister Maduro di Cultura ta gradici tur instancia cu a haci e eventonan aki posibel, Departamento di Cultura, Museo Cas Tan Tin, Departamento di Bombero, e agrupacion musical y tambe e grupo di hoben di Formacion Social, kendenan a yuda coordina y guia e muchanan durante nan yegada cu bus, e presentacion escolar, e recorido den Museo Cas Tan Tin y salida cu bus bek pa nan respectivo scolnan. Masha danki. Cultura bo tin cu bib'e y cu bo participacion bo ta engrandec'e.

Minister Xiomara Maduro





MINISTER

Geoffrey Wever

DIALUNA ANOCHI A INICIA TRABOUNAN DI LIMPIESA GENERAL DEN CAYA BETICO F. CROES



Dia 17 di juni a tuma luga inicio di un limpieza den Caya Betico F. Croes. Un trabou cu lo dura entre 15 pa 20 dia di trabou y ta parti esfuerso holistico di mantencion y revitalisacion di Oranjestad, cu ta un di e prioridadnan di ministerio di asuntonan economico y minister Geoffrey Wever.

Trabounan lo inclui 'trimming' di e matanan den Caya Betico F. Croes te na altura di gas station na final di caya, limpieza general di e area y tambe reemplazo di bakinan di sushi existente. E bakinan di sushi nobo ta un produccion di 100% plastico recolecta, produci na Aruba pa Plastic Beach Party. E bakinan nobo aki tin dobbel e capacidad di esnan bieuw y tambe ta bai inclui vaknan pa separacion di sushi, pa yuda na e esfuersonan comun y necesidad di separacion di desperdicio.

'Esaki ta un otro muestra cu gobierno di Aruba ta inverti pa atende cu e mehoracionnan necesario den e area na un forma structura, strategico y responsabel. E ultimo lunanan

aki nos tabata activamente bezig cu ehecucion di nos plan di Revitalisacion di nos centro di ciudad', segun minister Wever. Tur esakinan ta trabounan necesario pa crea mas seguridad, accesibilidad y mantene e zjeito natural di nos centro di ciudad.

E trabounan lo tuma aproximadamente 15 - 20 dia pa completa. Riba e prome anochi solamente ya caba a deshaci di 30 yarda di sushi y mata for di e area di La Moderna y Penha. E trabounan ta ser haci anochi pa minimalisa strobacion na fluho di hende y trafico.

A finalisa cu e parti de embeyecemento di Wilhelminastraat, e renovacion di Cas Veneranda ta avansando segun plan, mientras ta haciendo esfuersonan pa trece mas departamento di gobierno bek den nos centro di ciudad. 'Mas trafico, peaton y rendibilidad comercial ta finalmente nos meta final', segun e mandatario.



MINISTER ENDY CROES A REUNI CU DR. ROBIN DI PIETRO Y DEAN MIKE SAGAS DI UNIVERSITY OF SOUTH CAROLINA, SCHOOL OF HOSPITALITY, RETAIL AND SPORTS MANAGEMENT



Recientemente, dr. Robin di Pietro y Dean Mike Sagas di University of South Carolina tabata na Aruba y hunto cu Sra. Sue - Ann Lee di Universidad di Aruba a reuni cu Minister Endy Croes, unda cu trata varios punto di interes. Facultad di Hospitality and Tourism Management Studies (FHTMS) di Universidad di Aruba tin un colaboracion di mas di 14 aña cu University of South Carolina. Den e transcurso di aña nan a sostene FHTMS pa establece e programa di Bachelor y MBA. Awor nan ta explorando oportunidad pa brinda Aruba mas curso den e area di Sports Management and Event Management como parti di e acuerdo di colaboracion cu UA. Asina a cuminsa e aña aki cu e prome proyecto piloto, esta micro credencial pa profesional cu tin interes den Sports and Event Management pa ricibi guia practico pa por prepara y organisa evento deportivo na Aruba.

Center for Teacher Excellence (CTE):

Na luna di november 2023, Minister Endy Croes hunto cu un delegacion a realiza un bishita oficial na University of South

Carolina. Aki a haci e peticion pa e docentenan di Aruba tambe por bin na remarca pa sigui e cursonan cu University of South Carolina ta ofrece "online" den cuadro di profesionalisacion.

University of South Carolina tin un variedad masha grandi di curso reparti den primavera (lente) cu a inicia caba y ta termina den e luna di juli y e periodo di herfst cu ta inicia e luna di juli y ta culmina den e luna di december. Desde luna di juli proximo, a logra cu e "link" di University of South Carolina ta accesibel riba e plataforma di Matrix di Departamento di Enseñansa di Aruba, esta ea.aw y e docentenan local lo tin acceso tanto na Matrix, Lands Aruba Academy y awor tambe Center for Teaching Excellence pa asina tin un variedad amplio na e cursonan "online".

Minister Endy Croes ta gradici University of South Carolina y Universidad di Aruba pa e tremendo colaboracion y acuerdonan. Finalmente, Minister Endy Croes ta invita tur docente pa bishita e website di www.ea.aw pa registra. ■■■

MINISTER ENDY CROES A ATENDE APERTURA DI E 23 EDICION DI TAEKWONDO DEL CARIBE ARUBA 2024



Diasabra mainta, a tuma luga apertura di e di 23 edicion di Taekwondo del Caribe Aruba 2024 organisa pa Stichting Tiger Taekwondo Academy y Impact Taekwondo Aruba. Alrededor di 100 atleta di diferente pais entre otro, Colombia, Surnam, Honduras, Guadeloupe, Curaçao y Aruba a competi den e torneo. Minister di Deporte Endy Croes a atende e ceremonia di apertura, unda cu el a hiba palabra y a declara e campeonato oficialmente habri.

Ademas di esaki, a gradici Sr. Theofilo Rodriguez, Sr. Moises Fernandez, Sr. Guaicaipuro Jimenez, Sra. Marilu de Veer y Sra. Soraida Boekhoudt pa nan gran contribucion na e deporte di taekwondo. Pa finalisa, Minister Endy Croes ta gradici pa e invitacion y ta felicita Sr. Theo Rodriguez y e comision pa organisa un otro exitoso campeonato di taekwondo. ■



Minister Endy Croes:

11 ATLETA DI SHOTOKAN KARATE DO INTERNATIONAL ARUBA A REPRESENTA ARUBA DIGNAMENTE DEN MIAMI OPEN TOURNAMENT NA MERCA

E karatekanan a trece 7 medaya di oro, 4 di silver y 6 di brons

Recientemente, Minister di Enseñansa y Deporte Endy Croes a ricibi bishita di team Shotokan Karate Do International Aruba na Bestuurskantoor. Sensei Gustavo Velasquez, Sensei Juan David Velasquez y 11 atleta a biaha di 16 di mei pa 21 di mei na Merca pa e competencia di Miami Open Tournament. Durante e competencia aki, e atletanan a bin cu un total di 17 medaya: 7 di oro, 4 di silver y 6 di brons.

Durante e ocasion special aki, Minister Endy Croes a entrega nan un handbag di Premio Excelencia den Deporte (PED) y medaya di 4D, esta deseo, disciplina, determinacion y dedicacion. Sensei Gustavo ta gradici tur mayor y compania cu a contribui pa haci e biahe aki posibel. Minister Endy Croes ta felicita Sensei Gustavo Velasquez y Sensei Juan David Velasquez pa e tremendo trabou cu nan a haci pa prepara e atletanan aki pa representa Aruba dignamente den exterior. Pa finalisa, e mandatario di Deporte ta felicita e atletanan cu a destaca den Miami Open Tournament y pone Aruba su nomber den halto. ■■■■



MINISTER ENDY CROES A PRESENCIA KIDS ATHLETICS KLEUTER DI WEGANAN ESCOLAR 2024



Diabierna atardi, a tuma luga e popular Kids Athletics organisa pa IBiSA hunto e docentenan di movecion y salud. Minister Endy Croes tabata presente pa apoya e alumnonan den e competencia escolar aki. Un total di 8 scol a participa den Kids Athletics Kleuter. E teamnan a ser forma pa ocho (8) mucha pa ekipo di cual (4) mucha muhe y cuater (4) mucha homber entre 4 pa 6 aña. E proyecto aki ta siña e muchanan entre otro, movilidad y coordinacion.

Por a observa cu e alumnonan tabata hopi contento y a disfruta di e competencia. Na final di e atardi, Imelda Kleuterschool a conquista e prome luga di Kids Athletics Kleuter, segundo luga Arco Iris Kleuterschool y Colegio Conrado Coronel a keda na di tercer luga. Pa conclui, Minister Endy Croes ta gradici IBiSA y e docentenan di movecion y salud pa trek e bunita proyecto aki. “Pabien na e muchanan cu a haci e Kids Athletics Kleuter uno sumamente exitoso y pabien na e ganadonan”, Minister Endy Croes a finalisa. ■







ARUBA HYDROGEN VALLEY TA CONTINUA

Recientemente Minister di Energia Glenbert Croes hunto cu e delegacion di Aruba, consistiendo di WEB, RDA y Utilities Aruba, a reuni cu Director di Acciona Energia Sr. David Liste Alba y su team riba hidrogeno. Durante e reunion aki a yega na e conclusion, cu a pesar di desafionan cu tin actualmente, cu lo continua cu e proyecto di Aruba Hydrogen Valley.



Minister Croes a indica cu e vision di Gobierno ta pa logra bin cu e "Hydrogen Valley" riba e zona di refineria, mirando cu kier transforma e zona aki den un zona di energia renobabel. Pa cu esaki e ta sumamente importante pa Acciona Energia, Gobierno di Aruba, y companianan estatal percura pa e paisnan cu tambe ta den transicion energetico, compromete nan mes pa loke ta e importacion di hidrogeno for di Aruba.



Un dato hopi importante ta, cu Europa mester bay importa 70% di e hidrogeno cu nan mester pa aña 2030. Esaki ta un oportunidad grandi, mirando cu Aruba lo por produci parti di hidrogeno cu Europa mester y Aruba lo por suministra Europa cu un parti di esaki cu e hidrogeno cu Aruba ta bay produci. Esaki ta e siguiente paso cu Aruba mester tuma esta pa sigura cu Europa lo cumpra for di e.o. Aruba.



un pais cu ta traha na combati e efectonan di cambio climatico, reduciendo emisionnan y yuda contene loke ta e calentamento global pa asina nos existencia keda segura cu e plan di transicion energetico rumbo e tratado di Paris 2050.

Minister Croes a expresa cu Gobierno di Aruba ta sumamente agradecido na Acciona Energia, pa kere den pais Aruba, y pa procede den un momento asina crucial cu e proyecto di "Hydrogen Valley". E proyecto aki ta un inversion grandi, na unda lo transforma nos economia local, y comberti Aruba den

"Manera e refineria di Aruba pa 100 aña a hunga un rol den economia di mundo, e "Hydrogen Valley" mirando su importancia, tambe lo hunga un rol grandi pa loke ta e necesidad pa hidrogeno", Minister Croes a expresa. ■

2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

